

Expediente IET: P-22-052  
Proxecto: Parque eólico Marcofán  
Concello: Beariz, Boborás e O Irixo (Ourense)  
Promotor: Marcofán Eólica SL

## INFORME DE IMPACTO E INTEGRACIÓN PAISAXÍSTICA

De acordo co artigo 37.1 da Lei 21/2013, do 9 de decembro, de avaliación ambiental, e co artigo 11.3 da Lei 7/2008, do 7 de xullo, de protección da paisaxe de Galicia, con data do 17/03/2022 o Servizo de Enerxía e Minas de Ourense somete a informe do Instituto de Estudos do Territorio (IET) a documentación do proxecto de Parque eólico Marcofán.

### 1. Antecedentes:

Con data do 10/02/2022 o IET emitiu un informe de impacto e integración paisaxística, de acordo co previsto no artigo 11.3 da Lei 7/2008. Nese informe indicábase que o estudo de impacto e integración paisaxística (EIIP) elaborado non se axustaba completamente ao disposto na Lei 7/2008, do 7 de xullo, de protección da paisaxe de Galicia, e ao Regulamento da Lei 7/2008. Así mesmo facíanse unha serie de consideracións sobre distintas medidas que debería adoptar o proxecto para minimizar os impactos e acadar unha mellor integración paisaxística, sinalando a necesidade de mover ou eliminar as posicións 1 e 2 debido a forte intrusión visual sobre elementos de valor da paisaxe.

### 2. Marco legal:

Consonte co artigo 15 da Lei 1/2021, do 8 de xaneiro, de ordenación do territorio de Galicia, e co artigo 28 do Decreto 244/2011, do 29 de decembro (modificado polo Decreto 42/2019, do 28 de marzo), o Instituto de Estudos do Territorio (IET) é o órgano competente para emitir este informe en materia de paisaxe, de acordo co que para tal efecto establecen os artigos 32 e 33 do Regulamento para o desenvolvemento da Lei 7/2008, do 7 de xullo, de protección da paisaxe de Galicia, aprobado polo Decreto 96/2020, do 29 de maio (RLPPG).

En desenvolvemento da Lei 7/2008 aprobáronse o Catálogo das paisaxes de Galicia (Decreto 119/2016, do 28 de xullo) e as Directrices de paisaxe de Galicia (Decreto 238/2020, do 29 de decembro).

De acordo co artigo 11.1 da Lei 7/2008, todos os proxectos que deban someterse a declaración de impacto ambiental deberán incorporar no estudo de impacto ambiental un estudo de impacto e integración paisaxística (EIIP), como documento específico no que se avaliarán os efectos e impactos que o proxecto poida provocar na paisaxe e as medidas de integración paisaxística propostas. O contido do EIIP debe axustarse ao disposto no artigo 11.2 da Lei 7/2008 e nos artigos 26 e seguintes do RLPPG.

### 3. Análise do EIIP, dos efectos do proxecto sobre a paisaxe e das medidas de integración paisaxística:

A documentación achegada polo Servizo de Enerxía e Minas de Ourense consiste nun escrito de contestación (14/03/2022) e unha addenda ao EIIP (Marzo 2022). Nesta última amplíase a análise de visibilidade a un radio de 20 km, xustifícase a non viabilidade técnica de mover os aeroxeradores 1 e 2 debido á proximidade de núcleos rurais, doutras infraestruturas enerxéticas e de zonas de afección hidráulica, así como a inviabilidade económica do parque



no caso de eliminar eses aerogeradores. Tamén sinala como atenuante a presenza doutros aerogeradores dentro da AEIP Serra do Candán e Montes do Testeiro. Por último propón o cambio de modelo das posicións 1 e 2 por un de menor tamaño, pasando de 200 m de altura a 180 m.

Esta modificación supón unha redución da visibilidade do conxunto do parque eólico nun radio de 20 km dun 0,71 % respecto á visibilidade inicial, sen producirse apenas variación na visibilidade no interior da AEIP máis afectada.

Se ben a addenda fai unha correcta xustificación da inviabilidade técnica e económica de mover as posicións 1 e 2, esta non analiza outras posibles localizacións, concretamente ao norte da posición 3 continuando coa aliñación ou na proximidade dos mesmos.

Tamén se cita na addenda que se terá en conta o sinalado para o edificio de control en relación co acabado do mesmo segundo a Guía de cores e materiais, así como a medida correctora relativa a barreiras vexetais para os núcleos rurais en caso de manifesta preocupación social.

#### 4. Conclusión:

Estes contidos veñen a completar formalmente o EIIP do proxecto polo que pode considerarse cumprimentado o disposto no artigo 11.2 da Lei 7/2008 e nos artigos 26 e seguintes do RLPPG.

O maior impacto paisaxístico deste proxecto será a incidencia visual producida polos aerogeradores, que pola súa forma e altura, serán visibles desde unha ampla extensión de terreos e a longas distancias; esta incidencia perdurará no tempo durante o período de explotación do parque, e verase incrementada polo efecto sinérxico derivado da presenza doutros parques eólicos na contorna. Neste caso, entre as zonas máis afectadas pola incidencia visual cabe destacar a AEIP Serra do Candán e Montes do Testeiro e o miradoiro as Ameixeiras (principalmente polas posicións 1 e 2), así como os núcleos de poboación próximos. Esta incidencia visual non supón un impacto crítico, se ben deberase trasladar as posicións 1 e 2 ao carón dos outros aerogeradores, agás que quede debidamente xustificada a inviabilidade técnica desta nova localización.

En todo caso, de acordo co artigo 30.3 do RLPPG, as medidas de integración paisaxística deberán quedar oportunamente recollidas no proxecto.

José Luís Álvarez Vicente  
Xefe do Servizo de Planificación da Paisaxe

José Antonio Serantes Barbeito  
Director do Departamento Técnico de Estudos

Visto e conforme, Enrique Luís de Salvador Sánchez  
Director do Instituto de Estudos do Territorio

(Na data da sinatura electrónica)

